

IV. ENTIDADES LOCAIS

CONCELLO DE PIÑOR

BASES REGULADORAS PARA A CONCESIÓN DE AXUDAS Á ESCOLARIDADE NO CURSO 2024-2025

BASES REGULADORAS PARA A CONCESIÓN DE AXUDAS Á ESCOLARIDADE NO CURSO 2024-2025 DO CONCELLO DE PIÑOR

PRIMEIRO. OBXECTO

As presentes bases teñen por obxecto regular a convocatoria de axudas destinadas á colaboración financeira na adquisición dos libros de texto e demais material didáctico precisos para o normal desenvolvemento da actividade académica, co fin de compensar as familias do Concello de Piñor, en réxime de concorrència non competitiva, de acordo co artigo 55 do Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións.

SEGUNDO. NATUREZA XURÍDICA

As presentes bases axústanse e regulan de acordo co establecido na Lei 38/2003, do 17 de novembro, xeral de subvencións, a súa normativa de desenvolvemento e a Lei 9/2007, de subvencións de Galicia.

TERCEIRO. GASTOS SUBVENCIONABLES

Serán subvencionables os gastos derivados da adquisición de material escolar e complementario que sexa necesario como consecuencia da escolaridade de segundo ciclo de Educación Infantil, Educación Primaria e Educación Secundaria Obrigatoria (ESO).

Enténdese por material escolar:

- Material escolar funxible: cadernos, folios, cores, lapis, bolígrafos, cartafolios, tinta de impresora, libros...
- Material complementario: regras, estoxo, mochilas.
- Material deportivo: chándal, tenis, camisetas, calcetíns.
- Roupas de abrigo e calzado.

CUARTO. COMPATIBILIDADE

As axudas serán incompatibles con calquera outra axuda que puidese percibirse coa mesma finalidade doutras institucións, públicas ou privadas.

QUINTO. CONTÍA DAS AXUDAS

Para a concesión das axudas convocadas, destínase a cantidade de 3.000 euros, que se financiarán con cargo á aplicación orzamentaria 320.480, consignadas no Orzamento municipal vixente.

As axudas concederanse por rigorosa orde de presentación, ata esgotar o crédito orzamentario asignado. Non se poderá exceder do límite orzamentario.

A contía das axudas será de 45 euros por neno/a para os cursos de segundo ciclo de Educación Infantil, Educación Primaria e Educación Secundaria Obrigatoria (ESO).



SEXTO. BENEFICIARIOS

Poderán solicitar as axudas as persoas físicas pai, nai, titor/a, familia acolledora ou calquera outro que posúa a patria potestade ou tutela dun/dunha ou varios menores entre 3 e 16 anos escolarizados/as na etapa de segundo ciclo de Educación Infantil, Educación Primaria e Educación Secundaria Obrigatoria (ESO), e que cumpran os seguintes requisitos:

Estar todos os membros da unidade de convivencia empadroados no concello de Piñor como mínimo desde o 1 de xaneiro de 2024.

Estar escolarizados en centros de ensino públicos ou privados en tramos concertados de segundo ciclo de Educación Infantil, Educación Primaria e Educación Secundaria Obrigatoria (ESO).

Estar ao corrente no pago das obrigacións tributarias do Concello de Piñor.

Cumprir os requisitos establecidos no artigo 13 da Lei 38/2003, do 17 de novembro, xeral de subvencións.

Para efectos destas bases, enténdese por unidade de convivencia os cónxuxes, parellas de feito, os/as fillos/as maiores e menores de idade, os/as ascendentes de cónxuxes e titores legais que conviven no mesmo municipio, segundo o certificado de convivencia municipal.

Nos casos de separación ou divorcio, considerarase o pai ou a nai que teña a custodia dos menores declarada por sentenza xudicial. No caso de custodia compartida, considerarase a todos os proxenitores.

SÉTIMO. LUGAR, PRAZO E FORMA DE PRESENTACIÓN DAS SOLICITUDES

O prazo de presentación finalizará o 1 de decembro de 2024.

As solicitudes deberán presentarse, debidamente cubertas, no Rexistro Xeral do Concello de Piñor, ou por calquera medio dos establecidos no artigo 16.4 da Lei 39/2015, do 1 de outubro, de procedemento administrativo común das administracións públicas.

OITAVO. DOCUMENTACIÓN

A documentación preceptiva é a seguinte:

Anexo I da solicitude.

Anexo II e III, declaración responsable para o tratamento e protección de datos persoais.

DNI/NIE/pasaporte (en vigor) de todos os membros da mesma unidade de convivencia.

Certificado do centro educativo en que o menor ou menores estean matriculados.

NOVENO. OBRIGACIÓN DO BENEFICIARIO

As obrigacións dos beneficiarios son as seguintes:

Presentar debidamente cuberta a documentación requirida no prazo sinalado.

Cumprir coa actividade obxecto da axuda, é dicir, realizar o gasto nos conceptos sinalados en base ao número 3.

Acreditar o cumprimento da finalidade da axuda, mediante a presentación dos documentos xustificativos correspondentes (facturas orixinais ou compulsadas) dos gastos realizados para material escolar dentro do prazo establecido para o devandito fin.



Non ter pendente de xustificar ningunha subvención concedida polo Concello de Piñor.

Someterse ás actuacións de comprobación e control que sexan debidamente requiridas polos órganos municipais, proporcionando canta información lles sexa requirida no exercicio das devanditas actuacións.

Comunicarlle ao Concello de Piñor calquera modificación das circunstancias esixidas para a concesión da axuda.

Realizar o reintegro dos fondos públicos percibidos nos supostos recollidos no artigo 37 da Lei xeral de subvencións.

O incumprimento dalgunha destas obrigacións poderase resolver coa suspensión do pago da subvención ou co seu reintegro.

DÉCIMO. PROCEDIMENTO

O órgano competente para a concesión da axuda obxecto das presentes bases será a Alcaldía, tras o informe previo da Intervención Municipal.

O acordo de concesión ou denegación será motivado e quedará constancia no expediente dos fundamentos da resolución que se adopte. As axudas concedidas notificaránselles individualmente aos/ás interesados/as.

A modificación de calquera circunstancia que se tivese en conta para a súa concesión deberá serlle comunicada ao Concello, o que poderá dar lugar á modificación da resolución de concesión.

Toda publicación realizarase mediante publicación no taboleiro de anuncios e sede electrónica do Concello de Piñor.

UNDÉCIMO. XUSTIFICACIÓN E PAGO

O prazo de xustificación da axuda finalizará o 1 de decembro de 2024.

O pago realizarase mediante unha transferencia bancaria, tras a xustificación por medio da presentación de facturas orixinais.

As facturas deben estar expedidas a nome da persoa solicitante da axuda e os conceptos deberán aparecer suficientemente claros e descritos para a adecuada verificación da correspondencia cos conceptos subvencionables.

DUODÉCIMO. INCUMPRIMENTO DAS OBRIGACIÓNS POR PARTE DAS PERSOAS BENEFICIARIAS

Se as persoas beneficiarias da axuda non cumpriren coas obrigacións establecidas nas presentes bases, terán que reintegrar a subvención percibida, así como no caso de que se producisen modificacións na súa situación durante o período de solicitude que determinase o incumprimento dos requisitos para ser beneficiario da subvención.

No caso de que a xustificación do gasto realizado fose inferior á cantidade da subvención, o importe da axuda será o do gasto xustificado subvencionado.



DÉCIMO TERCEIRO. CONFIDENCIALIDADE E TRATAMENTO DE DATOS

Confidencialidade

O Concello de Piñor, en cumprimento dos principios de integridade e confidencialidade, tratará os datos persoais aos que teña acceso de forma que garantan unha seguridade axeitada incluída a protección contra o tratamento non autorizado ou ilícito e contra a súa perda, destrución ou dano accidental, mediante a aplicación de medidas técnicas ou organizativas apropiadas de conformidade co establecido na Lei orgánica de protección de datos de carácter persoal e no Regulamento 2016/679, relativo á protección das persoas físicas no que respecta ao tratamento de datos persoais e á libre circulación destes datos (Regulamento xeral de protección de datos).

Tratamento de datos

En cumprimento do disposto na Lei orgánica de protección de datos de carácter persoal e no Regulamento xeral de protección de datos, informarase os/as solicitantes de que os datos de carácter persoal que, no seu caso, sexan recollidos a través da presentación da súa solicitude e demais documentación necesaria para conceder a subvención, serán tratados por este concello coa finalidade de garantir o axeitado mantemento, cumprimento e control.

DÉCIMO CUARTA. NORMATIVA SUPLETORIA

En todo aquilo non establecido nas presentes bases, será de aplicación o disposto na Ordenanza xeral de subvencións do Concello de Piñor, Lei 38/2003, do 17 de novembro, xeral de subvencións, e a súa normativa de desenvolvemento.

O alcalde. Asdo.: José Luis González Rodríguez.

R. 2.775

